

# ANWAR JELAS TUGAS SISWA



**BUKIT MERTA JAM, Rabu.** — mahasiswa sebagai pengawas citarasa dan kesedaran rakyat hari ini digesa supaya lebih mendampingi masyarakat desa yang memerlukan pembelaan.

"Tugas mahasiswa ialah bukan setakat untuk mencapai kecemerlangan akademik sahaja tetapi juga sanggup turun ke sawah untuk membantu menyelesaikan masalah yang dihadapi oleh masyarakat desa," ujar Timbalan Menteri di Jabatan Perdana Menteri, Encik

Anwar Ibrahim.

"Masa mahasiswa dan kehidupan kampus tidak boleh terputus dari isu politik, sosial dan ekonomi negara ini," tambah Encik Anwar ketika merasmikan projek kajian ke atas tanah terblar di Kubang Semang, kira-kira 4 km dari sini semalam.

Seramai 76 siswa dan siswi tahun dua Universiti Kebangsaan Malaysia (UKM) dari Jabatan Geografi menyertai kajian selama seminggu bagi tanah-tanah terblar (rang) di kawasan Permatang Pauh, di sini.

Kajian menyeluruh melibatkan 15 buah kampung. Pensyarah kanan Amriah binti Buang dan dibantu oleh pensyarah Shaharuddin bin Ahmad dan isterinya Puan Nur

Azizah Ali mengetuai kajian tersebut.

Menurut Encik Anwar saranan kajian hendaknya yang dapat memberi kesan dan bermakna kepada masyarakat petani.

Mereka harus turun ke sawah untuk mendapatkan saranan yang sebenar dan memungut fakta-fakta mengapakah petani tidak mengusahakan tanahnya, kata beliau.

"Tugas anda semua bukan untuk keperluan kajian semata-mata tetapi tanggungjawab untuk mengatasi masalah kaum petani," katanya.

Encik Anwar juga berpendapat, ilmu yang sebenarnya ialah "ilmu melalui amalan" yang dilihat dari segi kerja

yang dilaksanakan.

Terdahulu dari itu, Ahli Exco merangkap Pengerusi Jawatankuasa Pertanian Negeri Encik Mohd. Shariff Omar berkata sebanyak \$2.1 juta berupa grant dari Kementerian Pertanian telah dibelanjakan untuk memulihkan tanah-tanah terblar di negeri ini.

Katanya, Kerajaan Negeri telah memberikan peruntukan tambahan \$700,000 bagi projek pemuliharaan kira-kira 4,000 hektar tanah terblar yang belum dipulihkan.

"Jawatankuasa Pertanian juga akan melawat kawasan tanah rang setiap minggu untuk mempercepatkan dan menenankan segala kerja pemuliharaan itu dilaksanakan dengarnya," jelasnya.